

正定府志卷之三十七

人物七

孝友

東坡有云人無所不至惟大不容僞余論人於孝友之際而不禁爲之三嘆也人生始孩繼而少長知愛知敬發於性之固然以行所無事聲色貨利之念動於中而至性由之漸薄雖日循夫晨昏定省之節徐行後長之儀而愛敬不存則亦僞焉爾奚取焉今觀往牒所載有生不識父悲哀之至而音容恍若有所見者有因父之忠節不得表白於世而欲赴闕以陳



之者有不憚數千里間關跋涉負骸骨而歸葬者有
廬於墓側晨夕悲號三年不笑語者有事其兄如父
視其兄之子如己子者有捐軀以救弟之難雖羈囹
圜嬰箠楚而不顧者當其任天而動一意孤行方且
不自知其所以然而精誠所格泉可使出於地芝可
使生於庭鵲可使繞於廬蛇可使馴於墓此其中有
天焉非人之所能爲也嗚乎夫天則何僞之有世嘗
謂君子爲庸德不爲奇行而於剖股廬墓之事鄙夷
之以爲儒者所不屑道吾謂骨肉之際無庸無奇惟
以根於至性爲貴耳性之所發往往有愚夫愚婦之

所爲而爲學士大夫所不能爲者嗚呼截裾燃豆非
素推風流人豪者歟

南北朝梁

甄 恬字彥約中山毋極人世居江陵數歲喪父哀感
有若成人家人矜其小以肉汁和飯飼之不肯食八
歲嘗問其母恨生不識父遂悲泣累日忽若有見言
其形貌則父也時以爲孝感家貧養母常得珍羞及
居喪廬於墓側常有異鳥集於冢樹恬哭則鳴哭止
則止又有白鳩白雀棲宿其廬州將表其行狀詔旌
門閭加以爵位官至安南行叅軍

唐

李知本趙州元氏人元魏洛州刺史靈六世孫父孝端仕隋爲獲嘉丞族弟太冲俱有世閥而太冲官婚最高鄉人語曰太冲無兄孝端無弟知本涉經術事親篤至與弟知隱雍順子孫百餘凡費用僮僕無間也大業末盜過閭不入相戒曰無犯義門往依者五百餘室皆賴免貞觀初知隱爲伊闕丞知本夏津令開元中孫纘爲給事中揚州長史知隱孫頤有文辭至太常少卿從祖兄弟位給事中凡四人謂孝德所致甄逢定州無極人父濟不屈安祿山死於宣城遂居

其地自力讀書不謁州縣歲饑節用以給親戚大饗
則賑其餘於鄉黨貧乏者朋友緩急輒出家貲周贍
以義著聞常以父名不得在國史欲詣京師自言二
和中袁滋表濟節行與權皐同科宜載國史有詔贈
濟祕書少監而逢與元稹善稹移書於史館修撰
愈曰濟棄去祿山及其反有名號又逼致之執不
卒不汙其名夫辨所從於居易之時堅其操於利仁
之世猶異懦者之所不爲蓋拂人之心難而害已之
避深也至天下大亂死忠者不必顯從亂者不必誅
而眷眷本朝甘心白刃難矣哉若甄生者弁冕不加

其身祿食不進其口直布衣一男子耳及亂則延頸受刃分死不回不以不必顯而廢忠不以不必誅而從亂在古與今蓋百一焉愈答曰謹詳足下所論載校之史法若濟者固當得書今逢又能行身幸於方州大臣以標白其先人事載之天下耳目徹之天子追爵其父第四品赫然驚人逢與其父俱當得書矣由是父子俱顯名

宋

陸宗師字傳道正定府靈壽人絳之子登進士第爲庶支判官提舉河北常平累官至集賢殿修撰知河南

府卒初宗師在神宗朝數賜對常弗忍去親側屢辭
官不拜世以孝與之

元

武德政正定人四齡父沒母蘇氏撫育之稍長備甘旨
順顏色以孝聞母死時天大旱掘地求水以供葬事
不能得方徬徨悲泣忽有二蛇躍出德政因默禱焉
二蛇一東一北隨其地掘之果得泉有司以聞詔旌
表其家

崔顯正定人父彰德以武功官兩浙江淮都轉運使
諡桓靖顯以蔭歷建平崇仁二縣尹轉常熟知州居

官所至以廉惠撫其民事親以孝聞承歡色笑久而益摯時人不稱其官咸以孝廉目之

卻 祥保定路行唐人穎悟嗜學通大義司通州倉積小心慎密未嘗有過至大己酉冬調博野縣宣課提領馳歸覲省時父仲章卧病親嘗藥餌衣不解帶日夜籲天求以身代父卒治喪以禮不尚緇黃廬於墓哀毀過節遂不起教授馬利用爲立孝行碑記之

明

張 慶正定人善事繼母伯父泰寄居河南甚貧慶迎歸養之供饍豐備過於所生州縣以聞旌其家

李從茂無極人兄弟八人同居元末兵荒全家避難他鄉和順如家居洪武初還家友愛益篤閨門之內從無間言

劉從訓正定人親終水漿不入口者數日殯葬後廬墓三年

婁應林正定人幼失怙母趙氏患填口瘡醫藥不進應林環侍悲泣多方救出門遇道士乞得藥云藥易引藥難也遂潛割股肉納藥燒飲次日母瘡大愈直指聞而旌其門

王來鳳獲鹿人事父昂甚孝父卒哀毀過常喪葬一裏

於禮廬墓三年始終勿懈邑人賢之有司奏聞旌表
王謚獲鹿人父璿爲江西吉水令致仕卒謚年十六
哀痛幾不欲生廬於墓側朝夕哭奠人以孝稱之
任鳳儀獲鹿諸生進士雍之子父卒哀毀幾絕廬於墓
側築臺立祠思慕不忘成疾而卒

賈賢獲鹿人爲江西巡檢父病願以身代及卒朝夕
哀慟廬墓三年不履家閭

許錠獲鹿人父歿廬於墓側植栢百餘株親手灌漑
遂成林人稱許氏栢

李愷無極人母亡三日水漿不入口寢苫枕塊負土

成塋廬於墓之水掘地尺餘泉湧出有白鳩哺雛其側永樂時有司奏旌表之

畢

鸞井陘人父文顯爲莒州學正卒於官鸞幼家貧

不能扶櫬藁殯於莒家業荒落晝耕夜讀奉母撫弟孝友備至母卒哭踊幾絕衰絰啣哀徒步至莒負父骨歸而合葬廬墓三年有馴鹿伴蛇之異詔旌其門鸞後舉正統壬戌進士官湖廣道監察御史

孫

禮新樂人幼具至性居母申氏喪以孝聞正統三

年父年八十九有疾禮侍湯藥不解衣者三月及卒慟哭幾絕與母合葬結廬其側五年四月縣蝗食禾

殆盡獨禮環墓田頃餘無恙有燕巢廬聞哭聲悲鳴
應之事聞旌表其間

劉守仁獲鹿人廬墓三年給匾旌之

董景龍獲鹿人與母在街舂米虎猝至啣其母景龍以
手抱虎項而拳擊之虎怒捨母而撲景龍衆往救母
子俱得脫

杜 荅井陘人天性孝友母沒廬墓三年臺使者以下
俱匾其門曰孝子

郝遜志井陘人太學生祥之子祖母張氏隨祖瑜大使
之任卒於官貧不能歸 藁葬梅嶺父病篤泣謂遜

志曰祖母骨未歸奈何遜志對曰兒在可歸也父歿葬事畢遂往負骸骨歸與祖合葬焉

尹榜李成龍俱井陘庠生事親以孝聞知縣屠英傳天寵前後給匾旌表

李之實井陘庠生親死廬墓三年號泣喪明本縣題匾旌之

楊桂井陘庠生闖寇之亂父與生母爲賊害事嫡母王氏愛敬備至

李威井陘人事親孝鄰里稱之

楊起威井陘人母病朝夕同卧榻承順不倦又常禱於

神願以身代

仇隆井陘人父早卒事母陳氏至孝母卒廬墓三年有白狼馴遶之異後以歲貢授陝西金縣縣丞

許諮井陘諸生父早亡事母至孝一夕聞叩扉聲啓之一青衣人曰願寄銅駝倏不見發視之皆銀也銀上有字云帝嘉孝子乃賜以銀母卒啜粥苦塊中弔者無不感動

李傑平山人景泰元年領鄉薦任光祿寺署正陞無爲州知州有古循良風少事繼母孝父沒哀毀骨立廬墓三年地產靈芝有司以聞旌表其門

秦由義新樂廩生賦質敦朴孝友性成成化十一年父
徽卒由義哀毀踰禮廬墓三年服終事母尤謹母卒
哀毀如前治喪畢與父合葬復廬墓側壘土成墳植
樹成林鴉鵲日旋繞廬側人以爲孝感所致後領宏
治甲子鄉薦仕平涼知縣

王懋元氏人少聰敏博學廩於庠事父母孝及歿廬
墓三年負土築臺方高各丈許悲哀骨立白兔至芝
草生有司以聞正德十一年詔旌其門曰孝行後貢
成均任上林苑監錄事

劉彊藁城人母鮑氏疾弗愈親侍湯藥憂形於色及

卒寢處墓側日夜哀號不已時有瑞鵲巢其上亦悲鳴弗去強負土築墳三載無斃正德四年有司以事聞旌表其門曰孝行

李恭欒城人母常病瘡危急恭割臂上肉煮湯供之六日母瘡遂愈人皆稱爲孝感所致

馮士光欒城人任經歷天性孝友父病躬侍湯藥衣不解帶卧不安席焚香告天願以身代歿後哀毀骨立數日不食越明年母亦亡擗踊悲號死而復甦葬祭盡禮居喪三年未嘗見齒

谷士廉行唐人趙府工正所工副父早卒事母二十餘

年盡孝母卒葬祖塋之次廬於墓側旦暮哀思奉祀時食人皆以孝稱之

周良屏行唐人天姿粹和奉事二人悅志承順父母病親嘗湯藥衣不解帶者數月歿則哀毀骨立其至性有過人者

秦元良行唐人兩事繼母委曲承順得其歡心知縣旌其門曰永錫爾類

李璉行唐武生事父母晨昏定省至老不倦親歿哀毀骨立卜宅營葬并祭掃必躬親鄉黨稱純孝云

高得祿行唐廩生至性深醇善事父母父病臥數年祿